



**Komunikadu Imprensa**  
**04 Juñu 2020**

## **JSMP husu ba deputadu sira hotu atu bele serbisu hamutuk ho estrutura Meja Parlamentu foun hodi aseguira funsionamentu PN**

JSMP husu ba deputadu sira hotu atu bele serbisu hamutuk ho estrutura Meja Parlamentu foun hodi aseguira funsionamentu normál Parlamentu Nasionál nian liu-liu fó prioridade ba lei importante sira ne'ebé pendente hela.

“Deputadu sira presiza serbisu hamutuk hodi aseguira funsionamentu normál órgaun ida ne'e. Nune'e, bele hasa'e tan produtividade serbisu Parlamentu nian liu-liu fó prioridade ba lei importante sira ne'ebé oras ne'e pendente hela, partikularmente Lei Anti Korrupsaun, Lei Orden ba Advogadu no Lei Podér Lokál no Desentralizasaun Administrativa no mós Lei Eletóral Assembleia Munisípal,” dehan Ana Paula Marçal, Diretora Ezekutiva JSMP.

Parlamentu Nasionál iha 19 Maiu 2020 halo votasaun no eleitu distintu deputadu Aniceto Guterres Lopes ba iha Prezidente Parlamentu Nasionál hodi destitui distintu deputadu Arão Noé de Jesus da Costa Amaral ho vota afavor 40 husi bankada Fretilin, PLP, Khunto no PD. Enkuantu deputadu sira husi bankada CNRT, PUDD no UDT/FM la partisipa iha prosesu votasaun ne'e.

Atu kompleta estrututa Meza Parlamentu Nasionál (PN) foun ne'e, iha 02 Juñu 2020, PN halo eleisaun ba Sekretária no Visesekretária foun ba Meza Parlamentu Nasionál ne'ebé antes ne'e lidera husi partidu CNRT no UDT/FM. Deputada Lidia Norberta husi partidu Fretilin eleita ba Sekretária Meza foun no deputadu António Nobre Tilman hosi partidu KHUNTO eleitu ba Visesekretáriu no segundu Visesekretária mantein ho deputada Regina Freitas hosi partidu PLP.

JSMP espera katak estrutura foun bele nafatin promove partisipasaun públiku iha jerál no partikularmente sosiedade sivíl iha prosesu halo lei hanesan tinan sira antes. JSMP mós apresia tebes Parlamentu Nasionál tanba kontinua promove igualidade jéneru liuhosi kompozisaun Meza Parlamentu no estrutura foun sira iha komisaun especializada.

Atu hetan informasaun liutan favor kontaktu direktamente:

Ana Paula Marçal  
Diretora Ezekutiva JSMP  
Telefone: 3323883 | 77040753  
Email: [ana@jsmp.tl](mailto:ana@jsmp.tl)  
[www.jsmp.tl](http://www.jsmp.tl)